

四庫全書

子部

欽定四庫全書

古今事文類聚新集卷十七

元 富大用 撰

樞密院部

樞密院

行樞密院同

歷代沿革唐代宗永泰中置內樞密使始以宦者為之  
初不置司局但有屋三楹貯文書而已其職掌惟承  
受表奏於內中進呈若人主有所處分則宣付中書

門下施行而已永泰中宦官董廷秀叅掌樞密事長  
慶中王守澄知樞密事舊左右軍容多入為樞密亦  
無視事之廳後僖昭時楊復恭西門季玄欲奪宰相  
權乃於堂狀後帖黃指揮公事此其始也後梁革唐  
世宦官之弊開平元年改樞院為崇政院唐莊宗同  
光元年復以崇政院為樞密院晉天福中以桑維翰  
知樞密院事四年廢樞密院

以劉處諫兼樞密奏議  
多不稱旨又處諫丁內

憂遂廢  
其院

開運元年復置周顯德六年范質王溥並叅

知樞密院事宋樞密院與中書對持文武二柄號為  
二府太平興國四年以石熙載為樞密直學士簽書  
院事簽書之名始此淳化三年以張遜知院事溫仲  
舒寇準同知院事同知院之名始此治平中以郭逵  
同簽書院事同簽書之名始此時陳升之三至樞府  
神宗欲稍異其禮乃以為知院元豐改官制議者欲  
廢密院歸兵部神宗曰祖宗不以兵柄歸有司故專  
命官統之互相維制不從然以密院聯職輔弼非出

使之名乃定置知院同知院二人專以兵機軍政為  
職元置樞密院掌凡武備機密之事有樞密使同知  
又有副使簽書院同簽書其屬有判官經歷都事照  
磨管勾等職在外又置行樞密院自副使始以下諸  
職皆同

羣書要語樞密院掌天子之機務及天下邊境軍馬之

政令

會要

宥密之府總樞密於萬微

王禹偁制

樞謨靖密

王曾制

聽解神機之劇

小畜集

典溫省之務

胡文恭行王疇妻制

仍冠中樞

溫公撰  
路公碑

宜冠聯於樞省

王岐公集

天極環樞神兵會府

文彥博制

北樞之躔筦典神務

賜張省詔

擢贊上樞

回蔡樞密

旋冠謨於宥

省

贈魯公亮批劉

樞要之司

六一集

密勿之司

楊文公表

樞使知院典

機務掌兵政出納密命以佐邦治

續會要

知院掌佐天子

執兵政

同上

宜總鴻樞

溫公集

丹地廻翔便總萬機之任

牋表

類

詩句惟仲淹弼一夔一契天實賁子子其敢忽曰衍汝

來汝子黃髮遂長樞府兵政無蹶予早識琦琦有奇骨

可屬大事重厚如勃

石徂休  
聖德詩

古今事實

天樞

後漢皇帝紀注春秋運斗樞北斗第一天樞第二璇第

三璣也

西樞

熙寧三年詔曰國家以西樞內輔翊贊本兵任為重矣

專掌兵籍

李綱除知樞密院奏云祖宗之法樞密院事掌兵籍虎符三衙管軍諸路帥臣主兵柄各有分守所以維持軍政萬世不易之法也

傳信錄

### 專統兵機

李綱以右丞被命樞筦奏云伏蒙聖恩除知樞密院事以被命鴻樞專統兵機宜得魁竒英偉之人以居其任

同上

### 三省聚議



常事密院自行至涉邊則三省聚議謂之開南廳

呂源明堂

壘記

三省同議

神宗改官制大事三省共密院同議進呈畫旨稱三省  
樞密院同奉聖旨三省官皆同簽付樞密院行之小事  
獨取旨行訖關三省每朝三省樞密院先同對樞密退  
侍於殿廬三省始留進呈三省事退樞密院再上進呈  
獨取旨遂為定制

同前

呈本院事

施大資點與樞密周公呈本院事上曰適來一二事卿等各陳所見甚關朝廷大體公復奏曰臣蒙陛下擢用日愧素餐疊蒙聖訓敢不竭股肱之力

言行錄

爭西府事

韓魏公曰慶厯中王希文彥國同在西府上前爭事議論各別下殿各不失和氣如未常爭也當時相善三人正如推車子蓋其心主於車可行而已不為已也

魏公別錄

發宣頭帖

郭崇韜安重誨為樞密使始分領政事不由中書直行  
下者謂之宣如中書之勅小事則發頭子擬堂帖也至

本樞密院用宣及頭子

家塾  
廣記

陳朝廷體

見呈本  
院事

周知世務

李諮字仲詢謚憲成嘗知樞密院事諮性明達周知世  
務處劇若閒暇在樞府抑僂倖號為稱職

東都  
事畧

召問治要

張忠定公熹字子公孝宗受禪召除同知樞密院事問  
為治之要公言內治乃可以外攘願詔百執事赴都省  
給札條具上大喜於是事大欲言不能自達者纖悉聞  
矣

言行錄

托以腹心

呂公著復同知樞密院事神宗手詔曰顧在廷之人有  
可以托中外腹心之寄均皇家休戚之重無逾卿者可

亟起視事

收之桑榆

呂公著拜同知樞密院事公著謝因奏曰臣老於間外蒙陛下收之桑榆唯知拳拳納忠以報恩

權衡人才

呂公著好士出於天性士大夫有以人物為意者必問其所知所聞叅覈以待上求上嘗謂輔臣曰公著之於人材其言不欺如權衡之於稱物也

通畧

筆識諸將

劉忠肅公珙字共父乾道三年擢同知樞密院公以本  
兵柄於諸將之能否不可以不周知乃自諸管軍統領  
官下至裨將佐日召三四人與語得其材用所宜輒筆  
識之以待選用

古今文集

雜著

上韓樞密書

蘇洵

太尉執事洵著書無他長及言兵事論古今形勢至自  
比賈誼所獻權書雖古人已往成敗之迹苟深曉其義  
施之於今無所不可昨因請見求進末議太尉許諾謹  
撰其說言語朴直非有驚世絕俗之談甚高難行之論  
太尉取其大綱而無責其纖悉蓋古者非用兵決勝之  
為難而養兵不用之可畏今夫水激之山放之海決之  
為溝塍壅之為沼沚是天下之人能之委江河注淮泗  
匯為洪波瀾為太湖萬世之不溢者自禹之後未之見

也夫兵者聚天下不義之徒授之以不仁之器而教之以殺人之事夫惟天下之未安盜賊之未殄然後有以施其不義之心用其不仁之器而試其殺人之事當是之時勇者無餘力智者無餘謀巧者無餘技故其不義之心變而為忠不仁之器加之於不仁而殺人之事施之於當殺及夫天下既平盜賊既殄不義之徒聚而不散勇者有餘力則思以為亂智者有餘謀則思以為姦巧者有餘技則思以為詐於是天下之患雜然出矣蓋



虎豹終日而不殺則跼踉大呌以發其怒蝮蝎終日而不螫則噬齧草木以致其毒其理固然無足恠者昔者劉項奮臂於草莽之間秦楚無賴子弟千百為輩爭起而應者不可勝數轉關五六年天下厭兵項籍死而高祖亦已老矣方是時分土諸將改定律令與天下休息而韓信黥布之徒相繼而起者七國高祖死於介冑之間而莫能止也連延及於呂氏之禍訖孝文而後定是何起之易而收之難也劉項之勢初若決河順流而下

誠有可喜及其崩潰四出放乎數百里之間拱手而莫能救也嗚呼不有聖人何以善其後太祖太宗躬擐甲胄跋涉險阻以斬刈四方之蓬蒿用兵數十年謀臣猛將滿天下一旦卷甲而休之傳四世而天下無變此何術也荆楚九江之地不分於諸將而韓信黥布之徒無以啓其心也雖然天下無變而兵久不用則其不義之心蓄而無所發飽食優游求逞於良民觀其平居無事出怨言以邀其上一旦有急是非人得千金不可使也

往年詔天下繕完城池西川之事洵實親見凡郡縣之富民舉而籍其名得錢數百萬以為酒食餽餉之用析聲未絕城輒隨壞如此者數年而後定卒事官吏相賀卒徒相矜古戰勝凱旋而待賞者比來京師遊阡陌間其曹往往偶語無所諱忌聞之士人方春時尤不忍聞蓋時五六月矣會京師憂大水鋤犁畚築列於兩河之壩縣官日費千萬傳呼勞問之聲不絕者數十里猶且眴眴狼顧莫肯効用且夫內之如京師之所聞外之如

西川之所親見天下之勢今如何也御將者天子之事也御兵者將之職也天子者養尊而處優植思而取名與天下為喜樂者也故其道不可以御兵人臣執法而不救情盡心而不求名出死力以捍社稷使天下之心繫於一人而已不與焉故御兵者人臣之事不可以累天子也今之所患大臣好名而懼謗好名則多植私恩懼謗則執法不堅是以天下之兵豪縱至此而莫之或制也頃者狄公在樞府號為寬厚愛人狎昵士卒得其

惟心而太尉適承其後彼狄公者知御外之術而不知  
治內之道此邊將材也古者兵在外愛將軍而忘天子  
在內愛天子而忘將軍愛將軍所以戰愛天子所以守  
狄公以其御外之心而施諸其內太尉不及其道而何  
以為治或者以為兵久驕不治一旦繩以法恐因以生  
亂昔者郭子儀去河南李光弼實代之將至之日張用  
濟斬於轅門三軍股慄夫以臨淮之悍而代汾陽之長  
者三軍之士踈然如赤子之脫慈母之懷而立乎嚴師

之側何亂之敢生且夫天子者天下之父母也將相者天下之師也師雖嚴赤子不敢以怨其父母將相雖厲天下不敢以咎其君其勢然也天子者可以生人可以殺人故天下望其生及其殺之也天下曰是天子殺之故天子不可以多殺人人臣奉天子之法雖多殺天下無以歸怨此先王所以威懷天下之術也伏惟太尉思天下所以長久之道而無務一時之名盡至公之心而無恤三軍之多言夫天子惟深仁以結其心太尉厲武

威以振其墮彼其思天子之深仁則畏而不至於怨思  
太尉之威武則愛而不至於驕君臣之體順而畏愛之  
道立非太尉吾誰望耶

上黃樞密書

朱晦菴

竊聞敵酋隕命種人遁走淮北遺民悉降我師此蓋天  
命眷顧宗廟社稷之靈肅清中原以全昇付莫大之慶  
海內同之然熹之愚慮獨不勝私憂過計敢以布於下  
執事蓋自戊午講和以至於今二十餘年朝政不綱兵

備弛廢國勢衰弱內外空虛近歲以來天啓聖心稍加振理時復漸有條緒然宿弊已深非得同心同德之臣素為海內所屬望者為之輔佐進賢退奸修滯補弊要之以盡而持之以久使其勢翕然而大變則未可以有為也前日不量事勢亟下親征之詔則既失之易矣然理直言順庶幾有成事同發機有進無退而曠日引月不聞進發之期任國政者不聞有寇忠愍之謀典宿衛者不聞有高武烈之請使諸將惰心六軍解體敵騎橫



突深入兩淮兵少而敵益強事急而糧已匱於是戒嚴未及兩月而募兵科借之禍已及民矣向非天佑皇家降罰于彼則勝負之決蓋未可知今日之事其不可謂諸公謀於廟堂之效羣帥攻城野戰之功亦已明矣愚謂君臣相戒兢慎祇肅改圖柄任益脩政理以荅揚上天眷顧之命不宜坐虞鄰國之難以幸為利而遽自以為安也抑今中原之地幅員萬里敵人奔走震駭之餘力未能爭朝廷坐視而不取非以計取之則功緒廣而

勞費多此正安危得失之機差之毫釐繆以千里不可以不審也熹竊以為必能因其人以守因其糧以食使東南之力不困然後根本固而不搖必有以大慰其來蘇之望以深結其同濟之心使西北之情益堅然後藩籬密而可恃必使敵人他日痛定力全之後不能復窺吾盧龍之塞然後朝謁陵廟還反舊京之事乃可言也不然今日朝廷之上侍從之列誰為能辦此者獨舊人之賢起而未用者一二公使之出則重於今日視師之

人授之政則賢於今日秉鈞之士獨恐朝廷終不聽用則無如之何耳夫今不早為計敵人士馬精強固未有損今茲所失獨完顏亮一夫耳萬一旬月之間復悉其衆挾其喪君之耻以來脩怨于我不知朝廷之議復以何計禦之斂民則民憔悴而不堪募兵則兵脆弱而無用將據中原而與之爭則形勢未習將棄中原而守淮泗則恢復無期不知議者何以處此苟處之未審而曰姑徐徐以待天幸之來則非愚之所敢知者是以私憂

過計夙夜拳拳而不能已也顧衰病之餘氣短辭拙不能言利害之實然其大要不遠是矣閣下以道學履踐致身廟堂在諸公間最有人望故熹敢以此言進觸冒威尊皇恐無地狂妄之罪惟左右者裁之

古詩

王樞密

朴

王禹偁

西樞經緯才慷慨遇真主文學中甲科風雲參霸府直躬在密勿未始畏強禦凭案讀古書箕踞視太祖澤欲

浸生民休將還遂古折寺過武宗排佛如韓愈盡髮羣  
苾芻使之藝禾黍兵威遂強盛人力不耗盡世宗征淮  
甸委任當留務馬前拜侯伯階下列碓斧叱咤氣生風  
將校汗如雨手築太平基胼胝不輟杵具瞻人有望衰  
運時不與云云世豈乏賢良材難具文武厯象過曦和  
文章敵燕許可能隨衆人冥冥歸塵土

樞密使

歷代沿革唐初延英宰相奏事樞密使立侍得預聞五

代後唐初以宦者為之後梁始兼用士人晉天福四年廢樞密院開運元年復置周亦有之宋初魏仁浦以宰相兼樞密使建隆三年以樞密副使兵部侍郎趙普為檢校太保充樞密使不帶正官自普始也又以宣徽北院使李處耘為南院使兼樞密副使自五代以來凡樞密院官皆文武叅用大中祥符七年以王嗣宗曹利用並為檢校太保充樞密副使亦不帶正官開寶元年以曹彬為樞密使領忠武軍節度使樞密帶節度自此始也

至道三年以鎮海軍節度曹彬兼侍中充樞密使彬自節鎮入秉旄

錢太平興國六年以樞密副使石熙載為戶部尚書

充樞密使以文資正官充使自此始也大中祥符五年以知樞密院王欽若陳堯叟同中書門下平章事充樞密使儒臣為樞使兼使相自此始也皇祐五年制以樞密使高若訥為尚書左丞觀文殿學士兼翰林侍讀學士同郡牧制置使故事罷樞密使當學士院降麻及若訥罷但令舍人草詞遂以為例元豐官制行罷使副紹興七年詔宥密本兵之地事權宜重

可依故事置樞密使副使閏月詔宰臣兼使同月詔  
樞使立班序竝依宰相例乾道五年以虞允文為樞  
密使竝班恩數竝依宰臣元亦置樞密使

又

詳見樞  
密院門

羣書要語自贊襄於袞職宜總領於星樞

王隨制

置使典

樞本兵總務

胡文恭制

法樞置弼陪幄議兵

同

召置法樞付

界大柄

批荅宋庠表

位登樞宥之冠

蘇魏公集

顯膺制命首贊樞

庭

六一集

尚虛黃閣之居始建紫樞之位

光膺制命登



贊國機

並同上

頃陪讓於宰塗旋冠謨於宥省

類表

導上

帝之命象在北樞本天下之兵侔于台府 叅裨四輔

冠領萬樞

並同上

位冠中書

除文彥博制

古今事實

降麻閣門

唐僖宗乾符六年以李順融為樞密使降白麻於閣門

出案與將相同

通鑑

宣麻公廟

舊例樞密使未帶使相省不宣麻至周太祖初潛歷試  
是任乃宣制於公朝今之宣麻自周太祖始

續翰  
林志

### 東院行印

後唐樞密使凡東西院二員宋朝亦東西院但行東院

印

會  
要

### 殿西候旨

唐大中故事對延英兩中尉先降樞密使候旨殿西宰

相奏事畢案前受事

號稱二府

樞密使宋朝首命趙韓王普時號稱二府禮遇無間每朝奏事與中書先後上所言兩不相知祖宗亦賴此以聞異同用分宰相之權

會要

典掌萬幾

太平興國八年王顯充樞密使上召謂曰卿代非儒門必寡學問今在朕左右典掌萬幾固無暇博覽羣書命左右取軍戒三篇賜之曰讀此則可以免面墻矣

同前

位極人臣

莊宗朝郭崇韜為樞密使崇韜既位極人臣權兼內外謀猷獻納必盡忠規士族朝論頗以收獎人物內外翕

然稱之

五代史

權侔宰相

梁之崇政使乃唐樞密之職蓋出納之任也至梁始用士人其備顧問參謀議于中則有之未始專行事於外也至崇韜重誨為之始復唐樞密之名然權侔宰相矣

後世因之遂分為二文事任宰相武事任樞密

安重誨傳

百度寢理

晉復置樞密院以桑維翰為使事無巨細一以委之數

月之間百度寢理

五代史

諸軍凜畏

周太祖之將鎮鄴也蘇逢吉請落樞密使曰樞密之任方鎮帶之非便史洪肇曰兼帶樞密所冀諸軍凜畏逢吉曰此國家之事也且以內制外則順以外制內豈得

便耶事雖不從物議多之

周知四方

曾魯國宣靖公公亮字明仲拜樞密使公在政府修紀  
網除弊事裁損冗兵又更制圖籍以周知四方兵數登  
耗三路屯戍衆寡地理遠近

不錯一事

王文定公召拜樞密使公在右府憂邊思職動中機會  
江西賴文政彬寇陳峒李接之變淮陰劫寇等公應酬

羽書號令賞罰明審平當上亦稱其毫釐不差樞密錢良臣語公曰近郭隸嘗云蒙宣諭王樞使在西府數年不曾錯一事

汰兵為民

龐穎公籍為樞密使以近世養兵之弊多而國用困竭於是大加簡閱揀放為民者六萬餘人減其衣糧之半者二萬餘人邊儲由是稍蘓焉

戒軍掠錢

郭崇韜為樞密從魏王平蜀大軍入西川城戒諸軍剽掠法令嚴峻估一錢必論之以法市不改肆

宣撫惟卿

周文忠公必大除樞密使上曰卿在西府備殫忠勞若有邊事宣撫惟卿可他人不能也

兵權付卿

韓世忠除樞密使上謂世忠曰朕付卿等以樞府本兵之權甚大卿宜合為一心勿分彼此則兵功全而莫之



能禦顧如兀术者又何足掃除乎

改詔救濫

張居翰同光中為樞密使偽蜀王衍既降詔遷其族於洛陽時關東已亂莊宗慮衍為變遣中官貴詔殺之詔云王衍一行並宜殺戮其詔已經印書時居翰在密地覆視其詔乃揩去行字改為家字及就戮止族其家近屬而已其偽宦及從行者尚千餘人皆免其枉濫居翰之功也

獻財助賞

郭崇韜為監脩國史兼樞密使初崇韜收汴洛稍通賂遺親友或規之崇韜曰余備位將相祿賜巨萬但偽梁之日遺賂成風今西方侯藩多梁之舊將皆吾射鈎斬祛之人也一旦草面化為吾人堅拒其請得無懼乎及裡郊崇韜悉獻家財以助賞給

### 朝服侍上

唐昭宗初即位有事于圜丘宿示于武德殿時兩中尉兩樞密皆朝服侍上

公服危坐

曹武惠王彬帝前密論天下事無不合上意而公堂會議如不能言太祖益所器重在宥密嘗公服危坐如對君父接小吏亦以禮未嘗以名呼歸私第唯閉閣宴居不妄通賓客一鼓方罷已待漏禁門矣雖霜雪不易其操如此者凡八年

爭事上前

慶厯三年杜衍為樞密使范仲淹出行門下時為參知政事數爭事上前衍無愠色而仲淹益敬服之

親賜隸字

夏竦為平章事臺諫交言其非改樞密使上親隸恭儉二字賜之又賜文行忠信四字以勉之

同上

敵使謂得人

王德用武臣也仁宗朝再入樞府為使是時富弼偕契丹使來德用伴射使者曰天子以公典樞密而富公為

相可謂得人矣

長編

天下望為相

田況拜樞密使天下顯顯望為宰相以致太平

不按匿名

長興三年邢州汝州戍兵還見訖於殿庭遺下匿名書  
論本指揮元霸率斂人錢物帝令張從賓按問樞密使  
范延光奏曰匿名文字准格不治禁訟端也不宜按問  
乃止

請定常例

大中祥符中詔樞密使帶檢校平章事不告引止於本

廳贊唱時王欽若陳堯叟上言請定常例先是曹彬以樞密使與相不告引故止用彬例

厨中賜食

宋朝之制大宴樞密副使不坐侍立殿上既而退就御厨賜食與閣門引進四方館使列坐廡下親王一人伴食每春秋賜衣入謝則與諸司使副班于庭中故朝中為之語曰厨中賜食階下謝表

道中奪印

曹利用天禧三年為樞密使後拜為鄆國公退朝歸私第道中有狂人奪其印以為不祥未幾以姪訥所累而貶死天下寃之

帳卧召問

莊宗即位郭崇韜為樞密院使時李紹宏請棄鄆州與汴人盟以河為界莊宗不悅獨卧帳中召崇韜問計崇韜曰陛下親御六軍長驅倍道直指大梁汴城兵望風自潰既若偽王授首賊將自然倒戈半月之間天下必

定莊宗蹶然而興曰正合吾意莊宗入汴皆崇韜之謀也

### 笏擊罷出

張耆初以恩幸為樞密使時晏殊為樞密副使上言耆初無他才能徒以恩幸遂極寵榮天下有私徇非才之議忤太后旨坐以笏擊僕出守南京上雖知其不當罷然不得已乃曰他日朕當大用之終以為相

### 會議俛睡

房暉與趙延壽同為樞密使時薛文遇劉延助居中用



事其聽用之言十不得三四但隨勢可否不為事先每朝廷議事曷與學士等環坐會議多於衆中俛首而睡其避事如此

讀奏不曉

五代後唐明宗不知書每四方章奏令樞密使安重誨讀之重誨多不曉文義

古今文集

雜著

除富弼樞密使制

范鎮

兵布于天下而至衆故統之有本元謀出於堂上而無窮故資之於明哲是以基於靜密式暢遠猷始乎幾微能成大務若時付畀茲謂劇艱前推恩協謀同德守正佐理功臣特進行禮部尚書同中書門下平章事昭文館大學士上柱國河南郡開國公富弼文武相資柔剛竝適誠貫金石材隆棟梁往在先朝嘗為上宰至言無隱精慮有聞方國計之是毗以親喪而遂去况夫西漢

而下巨唐以還訖于本朝凡厥公相率就起復以為權  
宜而卿因執禮經懇辭恩詔三年始事四海具瞻再炳  
台符之文兼崇樞極之任重倍多賦庸示褒章於戲天  
命甚難神器至重始初纘紹正賴經綸幸元老之聿及  
偕衆賢之同濟庶幾涼德罔累慶圖

除文彥博樞密使賜功臣制 王珪

天極環樞上通帝位之紀神兵會府內嚴師律之謀朕  
方垂講丕平進德常武雖天下無事思備禦之不敢忘

盖王者有征視安危之不敢忽適登髦傑資以輔予具  
官某器閎而深材敏以濟早貢賢人之業實膺聖考之  
知以忠孝之名形家國之盛節以文武之畧輯將相之  
大猷肆纂命於皇圖乃離憂於喪紀迫終哀戚甫見儀  
形屬疆事之方興煩師旌之載舉折衝境外方將出憺  
於王靈收畫幄中曷若坐圖於廟勝宜長機廷之務亶  
符巖石之瞻於戲過飪北戎未厭貪驕之志再盟西夏  
猶苞狂忽之圖終佇竒勲用恢遠馭

代汪樞密辭免表

汪藻

入叅廟算方俟黜幽進長樞庭更叨圖舊仰荷褒揚之  
過實深盈滿之憂敢布腹心仰干旒宸

中謝

臣竊以聖

主之用人也必量其材之所至忠臣之事主也先度其  
力之所堪故為之上者靡傷知人之明為之下者得逃  
曠職之累一失此道兩乖厥宜如臣者初乏經綸特緣  
遭遇二紀服周行之末一朝居多士之先昨叨近弼之  
除已過平生之望豈有方更於晦朔居然躡次於鈞衡

雖至無知敢忘自揣伏望皇帝陛下以隆寬覆物以獨  
斷馭臣知愚誠益出於由衷於成命何嫌於反汗別求  
賢佐共圖宏濟之功無使孤蹤益重疾顛之禍

謝表

汪藻

本柄于中久汙樞機之地進班其首更叨綸綍之恩蒙  
眷獎之非常私瑣材而不已安危所繫榮懼交深

中謝

伏念臣生江湖之鄉非廊廟之器偶扞防於牧圉蒙記  
錄於冕旒當中興無文武之材有慙吉甫乃一見受腹

心之寄自比留侯薦膺推擇之榮遂處弼諧之任謀參  
帷幄職總韜鈴永言國步之屯方賴廟謨之勝外有交  
侵之強敵內多竊發之姦民兩河未復於興圖二聖尚  
勞於岳狩非兵莫濟得士斯昌豈伊章句之腐儒堪此  
朝廷之大任茲蓋伏遇皇帝陛下治先稽古志在宅中  
躬堯舜之仁雖欲躋民於富壽據高文之憤不忘克己  
於憂勤詳延左右之臣猥及下中之品臣敢不兼收羣  
策務究遠猷念國家嘗膽之憂適當今日豈臣子捐軀

之報或後古人

代汪副樞辭免表

汪藻

聖神有作方收海內之人豪繇薄何功遽本朝廷之兵

柄顧超踰之已甚雖庸懵以知辭

中謝

竊惟樞筦之司

實次鈞衡之任唯時初載順信獲助於天人宜帝遠圖

安危注意於將相倘以小人而大受孰宣元老之壯猷

如某者生本寒鄉出陪多士早從外補甘心簿領之勞

浸齒周行敢望功名之會昨屬裔夷之謀夏猥承明詔



以臨州內撫三軍雖無奇策外乘一障僅守故封會帥  
幕之肇開總兵符而入侍扞防牧圉跋履山川逮九五  
御圖之初預三千同德之列負羈紲而巡天下自知罪  
戾之多聽鼓鼙而思將臣敢幸搜揚之及既委腹心之  
寄仍加體貌之優非不願榮懼終速謗伏望皇帝陛下  
特垂淵聽俯諒危衷收渙汗之誤恩責捐軀之後效義  
非所處雖匹夫不可以利回情有可矜在明主固容於  
理奪

## 樞密副使

歷代沿革五代梁崇政院置副使一人周末闕宋建隆中始以樞密直學士趙普及宣徽北院使李處耘等兼樞密副使自五代以來凡樞密院皆參用文武大中祥符七年以王嗣宗曹利用並為檢校太保充樞密院副使不帶正官元樞密院有樞密使及副使行樞密院則只自副使始

## 古今事實

有宰輔才

諫官歐陽修余靖蔡襄咸言樞密副使范仲淹有宰輔才器不宜局在兵庭上從其請以仲淹叅知政事

有公輔器

韓琦初罷相上問誰可以為執政者公力薦韓絳忠直有公輔之器上遂用為樞密副使既而有排毀絳者上曰韓琦之去惟薦此人朕豈可違

士民相慶

呂正獻公公著拜樞密副使初自河陽入朝都人環視  
相謂曰此公還朝百姓之幸也至是士民相慶既受命  
出殿門武夫衛卒皆歡忭咨嗟

士夫相賀

慶厯初元吳納款遂召韓琦范仲淹為樞密副使天下  
聞之士夫皆酌酒相賀曰上用韓琦仲淹非惟社稷幸  
乃天下生民之幸

持法守正

王文忠公堯臣為樞密副使持法守正以身任天下事  
凡濫恩倖請各隨其事其事可損損之可絕絕之至其  
大者皆著為定令在位六年廢職修舉皆有條理

止倖去弊

富弼除樞副仁宗責成於公開天章閣給筆札使書其  
所欲為遣中使二人更督之公主北事上當世之務十  
餘條又自上河北守邊十三策大畧以進賢退不肖止  
儼倖去宿弊為本欲漸易諸路監司之不才者使澄汰

所部吏於是小人始不悅矣

議差役弊

熙寧中韓絳遷樞密副使神宗問天下遺利公對求遺利莫若盡地力退具疏以謂害農之弊莫甚于差役請

委臺諫侍從

集議

補邊防闕

歐陽公脩為樞密副使公在兵府與曾魯公取天下兵數及三路屯戍多少地理遠近更為圖籍凡邊防久闕

屯戍者必加蒐補

長編

却偽蜀獻

沈義倫為隋軍轉運使入成都獨居僧寺蔬食偽蜀有以珍寶為獻者皆却之東歸繞圖書數卷上聞其清廉

擢為樞密副使

長編

辯轉運誅

李繼隆與轉運使盧之翰有隙遂奏轉運乏軍糧太宗怒召中使付三函令取之翰及某人首丞相呂端不敢

言樞密副使錢若水爭之請先驗有狀然後行法上大  
怒拂衣起入禁中二府皆罷若水獨留廷中上既食久  
之使人偵視廷中有何人報云有細瘦而長者尚立焉  
上出詰之曰朕所以擢任以爾為賢爾乃不材如是耶  
尚留此安俟對曰陛下不知臣無材使得待罪二府臣  
當不避死亡以報厚恩李繼隆外戚貴重莫比今陛下  
據一幅奏書誅三轉運使雖有罪天下何由知之鞠驗  
事狀明白加誅何晚焉上意解乃召呂端等奏請如若



水議先令責狀三人皆黜為行軍副使

言行錄

奏事盡言

韓琦為樞密副使兩府合班奏事琦必盡言雖屬中書琦亦對上陳其實同列尤不悅上獨識之曰韓琦性直阿意希旨

王沔臨事明察有通時之用頗苛碎深刻不以至誠待人能阿意希旨以自固祿位與張齊賢同任樞密副使頗不協

古今文集

雜著

除歐陽脩樞密副使制

王疇

夫詩美吉甫以有文武故賢特之士無施不可朕惟天下之重兵本之寄委于廊廟之臣責其講畫之用則待遇之意付畀之際敢不慎乎苟非材英豈易圖任具官某學通古今之宜性符履道之直議論明正懷負高典久居禁近之從屢更中外之事選所踐試悉著聲實今

樞筦之地籌勝是經擢貳大猷適竚休績惟公忠可以  
成務惟寅亮可以就功往其慎哉無廢朕命

辭樞密副使表

歐陽修

成命始行驟驚於衆聽撫心增懼曾莫以自容臣某

中

謝

竊以樞要之司朝廷慎選出納惟允實贊於萬機禮

遇均隆號稱於二府顧任人之得失當繫體之重輕苟  
非其材所損不一伏念器能甚薄風力不强少喜文辭  
殆浮華而少實晚勤學古終迂濶以自愚而自遭逢盛

明擢在侍從間嘗論天下之事言出而衆怨已歸思欲  
報人主之知智短而萬分無補徒措危躬於禍咎每煩  
聖造之保全既不適於時宜惟可置之間處故自叨還  
禁署逮此七年屢乞方州幾于十請瀝愚誠之懇至被  
明詔之丁寧惟大度并包猥荷優容之賜而羣賢在列  
敢懷希進之心豈謂伏遇皇帝陛下急於求人思以濟  
治因柄臣之竝選憐舊物以不遺而致遠之難力不勝  
者必速其覆量材不可能自知者猶得為明敢冀睿慈

察其迫切俾回渙渥更選雋良如此則器不假人各適  
賢愚之分物皆知報何勝犬馬之心

謝樞密副使表

歐陽修

右樞虛府充位宜求於雋賢多士盈庭誤選乃先於庸  
妄既牢辭之靡獲徒以寵而為憂臣某

中謝

伏念臣少

本賤愚初無志慮為小人之事力不勝於負薪程有司  
之文學止期於干祿過被仁恩之樂育早從英俊之並  
遊遂叨侍從之流久玷論思之地方時求治殆無補於

分毫顧質早衰況漸凋於齒髮但思藏縮敢望甄陞矧  
惟贊萬事之機必也極一時之選豈容濫得猥以備員  
當命令之始行方惶惑以失措而睿恩至渥召旨甚嚴  
莫諧邂逅之誠徒負貪榮之愧此蓋伏遇皇帝陛下廓  
天地之量垂日月之光憐樸直之無他謂疲駑之可免  
俾承闕乏以效拙勤臣敢不奮勵無能之姿感激難遇  
之會職思以位庶免於曠官謀不以身少期於報國

律詩

賀蔡副樞平羌慶捷詩

王介甫

城郭明王據兩陞軍前一日送降旗羌兵自此無傳箭  
漢甲如今不解累幕府上公聯舊代朝廷稱慶具新儀  
國家道泰西戎喙還見詩人詠串夷

簽書

歷代沿革宋太平興國四年石熙載

元懿公

以樞密直學

士簽書院事簽書之名自此始也八年張齊賢王沔  
並以右諫議大夫簽書樞密院事景德三年韓崇訓

檢校太傅馬知節為檢校太保並簽書樞密院事天  
禧四年以華州觀察使曹瑋為宣徽北院使鎮國軍  
留後簽書樞密院事簽書兼藩鎮自此始也元豐官  
制行使副簽書悉罷元祐初復置簽書樞密院事初  
除皆帶密直及罷政乃拜端明殿學士  
王彥霖靖康  
初李回首拜延康殿學士簽書延康今為端明自是  
遂為故事元詳見前樞密院

## 古今事實



無正員

簽書無正員為使之貳

續會要

不次用

王巖叟元祐六年拜簽書樞密院入謝延和太皇太后諭曰知君才望故不次進用公遜謝而退曰願陛下用人之際更加審察邪正難辨辨之少差治亂所係正人在朝則朝廷安邪人一進則朝廷便有不安之象二聖

深然之

言行錄

訪備邊事

馮拯簽書樞密院真宗訪以邊事拯以為備邊之要當  
須扼襟喉據險隘以制敵之衝若於保州威虜間依徐  
河以布陳裹糧其勢足以決勝

事畧

建中興議

權邦彥字朝美紹興間公在樞筦知無不言言無不盡  
謂宜乘機者三又建中興十議

言行錄

學士簽書

太平興國四年石元懿始以樞密直學士簽書院

春明退朝

錄

檢校簽書

景德三年馬正惠以檢校太傅韓公崇訓以檢校太保並簽書樞密院事又王德用字元輔累任拜檢校太保

簽書密院事

會要

諫議簽書

興國八年張齊賢王沔並以右諫議大夫簽書樞密院

事

同上

宣徽簽書

端拱元年以內客省使楊守一為宣徽北院使簽書密

院事

同上

古今文集

雜著

辭免簽書樞密院事劄子

樓鑰

惕聞渙渥俯震危衷伏念臣三際聖君四汙朝蹟仕甘

平進惟義命之是安心實靡他以樸忠而自立頃嘗去國本為奉親置散投閒久作山林之計匿瑕含垢率由天地之仁雖屢遭推剝之餘終不至排根之甚茲逢更化首辱召還既叨長於六官且悉歸於衆職亶為過分何敢僣求況已越於縱心比再祈於納祿不圖睿眷擢蒞樞臣典選固難尚能自勉本兵尤重安得冒居寵加秘殿之名兼預儲寮之列誤恩下逮羣聽皆驚既非衰迹之所堪抑亦多言之可畏伏望皇帝陛下收回成命

改畀英髦俾仍獻納之班馴遂退休之志倘獲免妨賢之誚庶不累知人之明

辭免簽書樞密院事表

樓鑰

誤恩下逮俾綴通聯遜牘上陳未頒俞旨仰冒蓋高之聽不嫌再瀆之煩

中謝

洪惟累朝特重右府豈獨為三

軍五兵之本抑使聞一日萬幾之微才則甚難官何必備顧愚臣之無取荷上意之深知起之掛冠閒廢之餘處以持橐清華之舊強顏寢久告老未諧尚不堪朝夕

之論思何以裨夙夜之宥密進寓承明之直更列元良之賓揣已奚堪逾涯莫甚欲望皇帝陛下俯垂淵鑒洞察忱衷念已迫於桑榆蓋居間地倘未遺於簪笏姑寘從班別求經濟之材以翊昇平之運

謝簽書樞密院事表

樓鑰

銓部為真猶未經於滿歲機廷遽貳乃遽辱於頒恩遜避靡遑周章增惕中謝竊以官莫崇於執政職無重於本兵必求文武之全材以任國家之重事邇隅甫定尚

勤宵旰之憂邦域以寧允藉弼諧之助豈應疲瘁可與  
幾微如臣者資實腐儒仕叨法從由久司於封駁故多  
積於怨仇十載歸閒仰戴乾坤之施一朝收召復觀日  
月之明不堪聽履之華復上垂車之請敢期誤渥俾贊  
洪樞血氣既衰止合奉身而去軍旅未學曷知基命之  
嚴玷書殿之清班忝儲局之下客被繡韉於上駟束鐻  
帶以襲衣采食有加寵榮已甚茲蓋伏遇皇帝陛下人  
惟求舊政務圖新謂代言於受禪之初未忘孤迹迨趣



還於更化之始深閔凋年豈云術業之可稱蓋自眷私之過厚遂容儼倖倍切凌兢臣敢不深感隆恩愈堅晚節老當益壯固欲殫報主之忠耄矣無能終恐負知人之鑒

同簽書

古今事實

始於治平

樞密院舊制無同簽書樞密院事者治平始以郭達為

之

神宗正史  
職官志

治平二年令郭達以宣徽使為同簽書樞

密院事

長編

諫議同簽

太平興國八年張司空齊賢王公沔竝以諫議大夫同

簽書樞密院事

春明退  
朝錄

處資淺才

簽書大抵以處資淺之人若簽書一經親祠方進同知

及樞副若武臣擢預國政只除同簽書

職源

舊都承旨 都事

歷代沿革都事舊無其官宋樞密院有都承旨似其職也蓋自太平興國中以楊守一充都承旨都承旨自守一始是時都承旨多用士人真宗後稍稍遂用吏人歐陽修建言請復舊制不克行熙寧二年始以東上閣門使李評為樞密都承旨不用院吏而更用士人自評始也寧熙五年以尚書比部員外郎集賢校理司修起居注曾孝寬為起居舍人充史館修撰兼

都承旨先是或用士人亦止於右職中選用文館兼  
領自孝寬始也元豐三年用張誠一為客省使都承  
旨自是都承復用武臣元祐中復以文臣帶待制充  
都承旨至崇寧以後則專用武臣矣紹興二年權禮  
部侍郎趙子書充徽猷閣待制密院都承旨自改官  
制後除大臣自子書始建炎四年高宗在會稽以武  
臣辛道宗為都承旨頗用事紹興元年十二月辛道  
宗既免乃詔依元祐職制置都承旨一員竝差兩制

為之元樞密院則無都承旨而有都事之官名異而職則同也

羣書要語宣納密命

曲阜除范純禮制

贊右府訏謨之微

同上樞

機之地親承密旨雖在副介亦須得人

曲阜除曹誘制

除補帷

幄以承密旨

除劉奉臣制

右府管天下之機務而承旨佐佑

叅總焉

洪水除張誠一制

古今事實

掌宣密命

都承旨副承旨掌承宣密命通領院務若便殿侍立閣  
試禁衛兵校則隨事敷奏承所得旨以授有司

四朝志

### 檢察功過

都承旨從五品副承旨正六品通領院務及承百司之  
事檢察主事以下功過而陞黜之凡御崇政延和殿則  
陞階侍立若禁衛兵校試技藝及蕃國入見則隨事敷  
奏所得旨以授有司

神宗正史  
職官志

### 請委疆事

王嚴叟字彥林為樞密都承旨湖北諸蠻互出擾邊公專請以疆事委荆南唐義問遂草檄文諭義問以朝廷方敦尚恩信勿為倣倖功賞之意其後終底綏寧

言行錄

為言邊防

洪文安遵兼權樞密院都承旨公既以近臣兼承密旨邊防民隱每為上言三衙春夏牧馬夏菰城仰給蘇湖秀三州適積水渰田有司預請倍輸夏麥以補芻粟北人索劉孝恭等二百家公皆執不可軍器刑敝命公料

簡公區別良窳衆謂非熟於軍旅者不能也上以是有

大用意

周並公集

### 正人宜留

劉安世作都承旨待制范相

純仁

之出由安世章疏已而

復拜吕相

大防

遂擬安世真定宣仁難之吕云劉安世曾

言范純仁今既復用宜少避之宣仁曰今既不作言事

官自不相妨其後樞密院奏事宣仁由前語韓師朴

忠彦

如吕之對宣仁曰如此正人宜且留朝廷遂輟

言行錄



文館兼領

熙寧五年以尚書比部員外郎曾孝寬充史館修撰兼都承旨文館兼領自此始

古今文集

雜著

樞密院官屬題名記

楊廷秀

此記為都承旨作其間以事其事不事其事反覆為言則今日建都事之職亦此意也中書樞密院曰二府國

朝之制也亦因也樞密之屬曰都承旨副承旨曰檢詳  
曰編修在祖宗時都承旨則曾孝寬韓縝檢詳則王存  
劉奉世編修則顧臨錢長卿皆其選也中興損益至今  
日都承旨檢詳各一員編修二員蓋六十年矣而壁記  
未立今都承旨李公昌圖乃克為之屬某記馬士之言  
曰樞屬與宰屬異劇與暇也暇者無事乎爾也樞屬無  
事乎爾耶無是事無是官有是官斯有是事矣有其事  
則必事其事事事則不暇矣曰暇者無乃不事其事

而強委之曰無事乎事其事以樞屬之職是乎未也等而上之曰使曰副曰知院曰同知曰簽書曰同簽書其號殊其建不並其為長貳均也建其長又建其貳又建其屬者何上表遺下之裨也下無以裨其上而曰吾惟事其事足也可乎古者工以藝諫蚺鼃以士師諫工與士師非諫職也然事君之誼有非職者乎無也而為樞屬顧曰吾暇無事也否則曰吾事其事足矣否則曰吾裨其上足矣至於事君之誼則曰思不出位又曰不如

守官外乎此非吾職也然則古之工與士師過矣豈惟  
工與士師孟子曰立乎人之本朝而道不行恥也然則  
孟子亦過矣其然乎不然吾徒獨得而不思其職也淳  
熙十三年五月三日廬陵楊某記



古今事文類聚新集卷十七